

LIGJ
Nr.10 317, datë 16.9.2010

**PËR DISA SHTESA DHE NDRYSHIME NË LIGJIN NR. 9121, DATË 28.7.2003 “PËR
MBROJTJEN E KONKURRENCËS”, TË NDRYSHUAR¹**

Në mbështetje të neneve 78 e 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 9121, datë 28.7.2003 “Për mbrojtjen e konkurrencës”, të ndryshuar, bëhen këto shtesa dhe ndryshime:

Neni 1

Në nenin 2 pika 1, pas shkronjës “b” shtohen shkronjat “c” dhe “ç” me këtë përmbajtje:

“c) ndërmarrjet publike dhe ndërmarrjet, të cilave u janë dhënë nga shteti të drejta ekskluzive ose të drejta të veçanta;

ç) ndërmarrjet, të cilave u është dhënë e drejta e ushtrimit të veprimtarisë në fushën e shërbimeve me interes ekonomik të përgjithshëm apo ato, të cilat kanë karakterin e monopoleve të orientuara drejt sigurimit të të ardhurave, për sa kohë dhe në atë masë që në ligj dhe në fakt nuk pengohet veprimtaria e tyre.”.

Neni 2

Në nenin 3, pikat 4 e 5 ndryshohen si më poshtë:

“4. “Marrëveshje” janë marrëveshjet dhe/ose praktikat e bashkërenduara ndërmjet dy apo më shumë ndërmarrjeve, si dhe vendimet ose rekomandimet e grupimeve të ndërmarrjeve, pavarësisht nga forma, e shkruar ose jo, apo nga forca detyruese e tyre.

5. “Pozitë dominuese” është ajo fuqi ekonomike e mbajtur nga një ose më shumë ndërmarrje, që i jep atyre mundësinë për të penguar konkurrencën efektive në treg, duke i bërë ato të afta të veprojnë, për sa i takon ofertës ose kërkesës, në mënyrë të pavarur nga pjesëmarrësit e tjerë në treg, si konkurrentët, klientët ose konsumatorët.”.

Neni 3

Në nenin 4 pika 1, shkronja “ç” ndryshohet si më poshtë:

“ç) në marrëdhëniet tregtare me palët e tjera, zbatojnë kushte të ndryshme për transaksione të njëjta, duke i vendosur ato në gjendje të pafavorshme konkurrence.”.

1. I përafëruar plotësisht me:

- Nenet 101 – 106 të Traktatit mbi Funkcionimin e Bashkimit Europian (TFBE) Gazeta Zyrtare e Bashkimit Europian, Seria C 115, datë 9.5.2008, fq 47 – 199.
- 32003R0001, Rregullorja e Këshillit 1/2003/KE, datë 16 dhjetor 2002 “Mbi Implementimin e Rregullave të Konkurrencës të parashikuara në nenet 81 dhe 82 të Traktatit të KE-së”, Gazeta Zyrtare e Bashkimit Europian, Seria L 1, datë 4.1.2003, fq. 1 – 25.
- 32004R0139, Rregullorja e Këshillit 139/2004/KE, datë 20 janar 2004 “Mbi Kontrollin e Përqendrimeve të Ndërmarrjeve”, Gazeta Zyrtare e Bashkimit Europian, Seria L 24, datë 29.1.2004, fq. 1 – 22.

Neni 4

Neni 5 ndryshohet si më poshtë:

“Neni 5

Përfshirja individuale e marrëveshjeve

Mund të përfshihet nga zbatimi i pikës 1 të nenit 4 çdo marrëveshje, e cila kontribuon në përmirësimin e prodhimit ose të shpërndarjes së produkteve ose në nxitjen e progresit teknologjik apo ekonomik, nëse një pjesë e mjaftueshme e këtyre përfitimeve shkon në favor të klientëve e të konsumatorëve dhe kur:

1. Nuk përmban kufizime të veprimtarive të ndërmarrjeve pjesëmarrëse, që nuk janë të domosdoshme për të arritur objektivat e sipërpërmendur;
2. Nuk kufizon, në mënyrë të ndjeshme, konkurrencën në lidhje me produktet apo shërbimet, objekt i këtyre marrëveshjeve.”.

Neni 5

Neni 6 ndryshohet si më poshtë:

“Neni 6

Përfshirja e kategorive të marrëveshjeve

Komisioni miraton rregullore për kategoritë e marrëveshjeve që përfshihen nga ndalimi i parashikuar në pikën 1 të nenit 4. Në këto rregullore përcaktohen me hollësi kushtet që duhet të përmbushin marrëveshjet, për të përfituar nga përfshirja e ndalimit të parashikuar në pikën 1 të nenit 4.”.

Neni 6

Neni 7 ndryshohet si më poshtë:

“Neni 7

Marrëveshjet me rëndësi të vogël

Mund të përfshihen nga zbatimi i pikës 1 të nenit 4 ato marrëveshje, të cilat nuk e kufizojnë ndjeshëm konkurrencën në treg, në rast se pjesa e tregut e të gjitha ndërmarrjeve së bashku, pjesëmarrëse në këtë marrëveshje, nuk tejkalon:

- a) 10 për qind të tregut përkatës, ku pjesëmarrësit janë konkurrentë aktualë ose potencialë;
- b) 15 për qind të tregut përkatës, ku pjesëmarrësit nuk janë konkurrentë aktualë ose potencialë.”.

Neni 7

Neni 9 ndryshohet si më poshtë:

“Neni 9

Abuzimi me pozitën dominuese në treg

1. Ndalohet çdo abuzim me pozitën dominuese nga një ose më shumë ndërmarrje, që e zotërojnë këtë pozitë në treg.

2. Mund të përbëjnë abuzim me pozitën dominuese veçanërisht:

a) vendosja, në mënyrë të drejtpërdrejtë ose të tërthortë, e çmimeve të padrejta të blerjes ose shitjes apo e kushteve të tjera të padrejta të tregimit;

- b) kufizimi i prodhimit, tregjeve ose zhvillimit teknik;
- c) zbatimi i kushteve të pabarabarta për veprime tregtare të njëjta me palët, duke i vendosur ato në gjendje të pafavorshme konkurrence;
- ç) vendosja e kushteve për lidhjen e kontratave me palët e tjera, që këto të fundit të pranojnë detyrime shtesë, të cilat, për vetë natyrën e tyre ose sipas praktikave tregtare, nuk kanë lidhje me objektin e kontratave në fjalë.”.

Neni 8

Neni 10 ndryshohet si më poshtë:

“Neni 10

Përqendrimi i ndërmarrjeve

1. Përqendrim të ndërmarrjeve kemi në rastet kur shkaktohet një ndryshim i qëndrueshëm i kontrollit, si rrjedhojë e:

a) bashkimit të dy ose më shumë ndërmarrjeve ose pjesë ndërmarrjesh të pavarura nga njëra-tjetra;

b) përfitimit të kontrollit të drejtpërdrejtë ose të tërthortë, nga një ose më shumë persona fizikë, të cilët njëkohësisht kanë kontrollin e të paktën një ndërmarrjeje tjetër ose nga një ose më shumë ndërmarrje, mbi një ose më shumë ndërmarrje, ose të një pjesë të këtyre të fundit, përmes blerjes së aksioneve, kuotave apo aseteve, kontratës ose çdo mjeti tjetër të ligjshëm;

c) kontrollit të drejtpërdrejtë ose të tërthortë mbi një ose më shumë ndërmarrje ose të një pjesë të këtyre të fundit.

2. Kontrolli, sipas shkronjës “b” të pikës 1 të këtij neni, mund të përfitohet nëpërmjet të drejtave, kontratave ose çdo mënyre tjetër, të cilat, më vete ose të kombinuara dhe, duke marrë parasysh rrethanat e faktit ose të ligjit, krijojnë mundësinë e ushtrimit të një ndikimi vendimtar mbi veprimtarinë ekonomike të një ndërmarrjeje, në veçanti, me anë të:

a) së drejtës së pronës ose të së drejtës për të përdorur të gjitha ose një pjesë të aktiveve të një ndërmarrjeje;

b) të drejtave ose kontratave, që ndikojnë në mënyrë të ndjeshme në përbërjen, votimin ose vendimet e organeve drejtuese të një ndërmarrjeje.

3. Krijimi i një ndërmarrjeje të përbashkët nuk përbën një përqendrim, sipas këtij neni, në rast se ka për objekt apo pasojë bashkërendimin e veprimtarive konkurruese ndërmjet dy ose më shumë ndërmarrjesh të pavarura. Në këtë rast, krijimi i një ndërmarrjeje të përbashkët vlerësohet në bazë të nenit 4 të këtij ligji.”.

Neni 9

Neni 12 ndryshohet si më poshtë:

“Neni 12

Kontrolli i përqendrimeve

1. Përqendrimet e ndërmarrjeve njoftohen në Autoritet për të marrë autorizim, nëse, në vitin e fundit financiar, para përqendrimit:

a) xhiroja e të gjitha ndërmarrjeve pjesëmarrëse së bashku në tregun ndërkombëtar është më shumë se 7 miliardë lekë dhe xhiroja e të paktën një ndërmarrjeje pjesëmarrëse, në tregun e brendshëm, është më shumë se 200 milionë lekë.

b) xhiroja e të gjitha ndërmarrjeve pjesëmarrëse së bashku në tregun e brendshëm është më shumë se 400 milionë lekë dhe xhiroja e të paktën një ndërmarrjeje pjesëmarrëse, në tregun e brendshëm, është më shumë se 200 milionë lekë.

2. Përqendrimet e parashikuara në pikën 1 të këtij neni njoftohen brenda 30 ditëve nga lidhja e marrëveshjes për bashkim, për përfitim kontrolli ose për krijimin e një ndërmarrjeje të përbashkët, me karakteristikat e parashikuara në pikën 3 të nenit 10 të ligjit, si dhe nga publikimi i ofertës publike për blerje ose shkëmbim.

3. Ndërmarrje pjesëmarrëse, në kuptimin e këtij neni, janë:

a) në rast bashkimi, ndërmarrjet që bashkohen;

b) në rast përfitimi kontrolli, ndërmarrjet dhe/ose personat e parashikuar në shkronjën “b” të pikës 1 të nenit 10, që përftojnë kontrollin, dhe ndërmarrjet ose pjesët e ndërmarrjeve, që bëhen objekt të përfitimit të kontrollit;

c) në rast krijimi të një ndërmarrjeje të përbashkët, sipas pikës 3 të nenit 10, ndërmarrjet që kanë kontrollin e ndërmarrjes së përbashkët.”.

Neni 10

Neni 13 ndryshohet si më poshtë:

“Neni 13

Vlerësimi i përqendrimit

1. Komisioni ndalon përqendrimet e ndërmarrjeve, që kufizojnë, në mënyrë të ndjeshme, konkurrencën në treg ose në një pjesë të tij, në veçanti, si rezultat i krijimit ose forcimit të pozitës dominuese.

2. Komisioni, në vlerësimin e përqendrimeve, mund të marrë, gjithashtu, parasysh, eficientat ekonomike që mund të rrjedhin nga përqendrimi, nëse plotësohen të gjitha kushtet e mëposhtme:

a) eficientat në fjalë kontribuojnë në rritjen e mirëqenies së konsumatorëve ose, të paktën, neutralizojnë efektet e mundshme negative që mund të sillte përqendrimi;

b) eficientat ekonomike janë ose do të jenë rezultat i përqendrimit nën shqyrtim dhe, për krijimin e tyre, nuk ekzistojnë mënyra alternative më pak antikonkurruese, se përqendrimi në fjalë;

c) eficientat ekonomike duhet të jenë të verifikueshme.

3. Komisioni, në raste të veçanta, mund të mos ndalojë përqendrimet, kur njëra nga ndërmarrjet pjesëmarrëse rrezikon seriozisht të falimentojë e nuk ka mundësi tjetër më pak antikonkurruese se realizimi i përqendrimit nëse:

a) ndërmarrja ndodhet në një situatë të tillë që, pa këtë përqendrim, duhet të dalë nga tregu në një të ardhme të afërt;

b) nuk ka mundësi për riorganizimin e veprimtarisë së kësaj ndërmarrjeje.”.

Neni 11

Në nenin 21, pas pikës 3 shtohet pika 3/1 me këtë përmbajtje:

“3/1. Tre muaj para përfundimit të mandatit të çdo anëtarit të komisionit, autoriteti njofton me shkrim Kuvendin, i cili fillon praktikën për zgjedhjen e anëtarit të ri. Në rastet kur mandati i anëtarit të komisionit ka përfunduar dhe nuk është realizuar emërimi i anëtarit të ri, anëtari i vjetër qëndron në detyrë deri në zëvendësimin e tij.”.

Neni 12

Në nenin 24, pas shkronjës “g” shtohet shkronja “gj” me këtë përmbajtje:

“gj) përcakton përparësitë e hetimeve dhe afatet përkatëse për to.”.

Neni 13

Në nenin 27 pika 2, fjala “punonjësit” zëvendësohet me fjalën “nëpunësit”.

Neni 14

Pas nenit 29 shtohet neni 29/1 me këtë përmbajtje:

“Neni 29/1

Trajtimi i ankesave

Palë të treta ose të interesuara për çështje që lidhen me kufizime, shtrembërime ose pengime të konkurrencës, paraqesin pranë Autoritetit të Konkurrencës ankesa a njoftime për këto konstatime. Autoriteti ruan dhe garanton mbetjen anonim të ankuesit, sa herë që ky i fundit e kushtëzon një gjë të tillë.

Ankesat ose njoftimet, pavarësisht nga mënyra e paraqitjes, pasi shënohen në regjistrin e protokollit, përcillen për trajtim profesional, brenda një afati të përcaktuar, në sekretariatin e Autoritetit. Procedurat e trajtimit të ankesave përcaktohen në rregulloren e funksionimit të Autoritetit.”.

Neni 15

Në nenin 33 bëhen këto ndryshime:

a) Pika 1 ndryshohet si më poshtë:

“1. Në çdo kohë, Autoriteti, me anë të një kërkesë të sekretariatit ose të komisionit, mund t’u kërkojë të tretëve, ndërmarrjeve ose grupimeve të ndërmarrjeve, t’i sigurojnë të gjitha informacionet e nevojshme, për zbatimin e këtij ligji, përfshirë edhe ato, të cilat përmbajnë sekrete tregtare.”.

b) Pika 4 shfuqizohet.

Neni 16

Në nenin 35 pika 3, emërtimi “Policisë Tatimore” zëvendësohet me emërtimin “Policisë së Shtetit”.

Neni 17

Neni 41 ndryshohet si më poshtë:

“Neni 41

Hetimi në sektorët e ekonomisë

1. Autoriteti, me nismën e tij, me kërkesën e Kuvendit ose me kërkesën e institucioneve rregullatore të sektorëve përkatës, mund të kryejë një hetim të përgjithshëm në një sektor të ekonomisë, nëse ngurtësia e çmimeve ose rrethana të tjera të bëjnë të mendosh se konkurrenca në treg kufizohet ose shtrembërohet.

2. Autoriteti mund t’u kërkojë ndërmarrjeve ose grupimeve të ndërmarrjeve që t’i sigurojnë të gjitha informacionet e nevojshme për kryerjen e hetimit.

3. Autoriteti mund të publikojë një raport për rezultatet e hetimit të përgjithshëm në një sektor të ekonomisë, si dhe mund të ftojë palët e interesuara të shprehen për rezultatet e hetimit.

4. Parashikimet e neneve 33 e 34 të këtij ligji zbatohen edhe për pikën 2 të këtij neni.”.

Neni 18

Neni 42 ndryshohet si më poshtë:

“Neni 42

Hetimi paraprak

1. Sekretariati, me miratimin e komisionit, mund të fillojë hetimin paraprak, me nismën e tij, me ankesë të palëve të interesuara ose të treta, për kufizime, shtrembërime apo pengime të konkurrencës. Sekretariati fillon hetimin paraprak, sa herë që kërkohet nga komisioni.

2. Gjatë hetimit paraprak nuk nënkuptohet e drejta për të konsultuar dosjet.

3. Autoriteti ruan mbetjen anonim të ankuesit, sa herë që ky i fundit e paracakton një gjë të tillë.”.

Neni 19

Neni 43 ndryshohet si më poshtë:

“Neni 43

Hetimi i thelluar

1. Kur vihen re shenja të kufizimit të konkurrencës, fillohet procedura e hetimit të thelluar. Komisioni merr vendim për fillimin e procedurës së hetimit të thelluar dhe përcakton hapat për realizimin e tij. Vendimi zbatohet nga sekretariati i komisionit.

2. Afati i përfundimit të procedurave të hetimit të thelluar është deri në 6 muaj nga data e vendimit të komisionit për hapjen e hetimit të thelluar.

3. Afati, sipas pikës 2 të këtij neni, mund të zgjatet me vendim të komisionit, në rast se kërkohen hetime të mëtejshme, që kanë të bëjnë me prova, të dhëna shtesë dhe ekspertizë të specializuar për shqyrtimin e rastit.

4. Procedurat hetimore, të parashikuara në nenet 41, 42 e 43 të këtij ligji, kryhen sipas rregulloreve të dala në zbatim të këtij ligji.

5. Komisioni shprehet me vendim për mbylljen e hetimit, në zbatim të neneve 41, 42, e 43 të këtij ligji, edhe në rastet kur nuk konstatohen shenja të kufizimeve të konkurrencës.”.

Neni 20

Në nenin 49 bëhen këto shtesa dhe ndryshime:

1. Pika 1 ndryshohet si më poshtë:

“1. Në zbatim të nenit 5 të këtij ligji, ndërmarrjet ose grupimet e ndërmarrjeve njoftojnë në Autoritet marrëveshjet dhe ndryshimet e bëra në to.”.

2. Pika 3 ndryshohet si më poshtë:

“3. Njoftimi i dhënë Autoritetit, sipas kërkesës së pikave 1 e 2 të këtij neni, nuk duhet të përmbajë të dhëna të pasakta, të cilat bëhen shkak për të siguruar përjashtimin për palën njoftuese ose për një palë të tretë, sipas nenit 5 të këtij ligji.”.

3. Pas pikës 3 shtohet pika 4 me këtë përmbajtje:

“4. Ky nen nuk zbatohet për përjashtimin e kategorive të marrëveshjeve, të parashikuara në nenin 6 të këtij ligji.”.

Neni 21

Neni 50 ndryshohet si më poshtë:

“Neni 50

Vendimi për përjashtime individuale

1. Marrëveshjet e njoftuara në bazë të nenit 49 të këtij ligji përjashtohen nga ndalimi i parashikuar në nenin 5 vetëm me vendim të komisionit.

2. Efektet e përjashtimit fillojnë nga data e njoftimit. Përjashtimet, sipas nenit 5 të këtij ligji, janë të kufizuara në kohë dhe mund t'u jepen ndërmarrjeve me kushte dhe detyrime.

3. Nëse me vendim të komisionit refuzohet përjashtimi nga ndalimi, komisioni nuk mund të vendosë gjoba për shkeljet e shkaktuara nga kjo marrëveshje, për periudhën gjatë së cilës ajo shqyrtohet. Komisioni i konkurrencës nuk mund të vendosë gjoba për ato ndërmarrje, të cilat kanë njoftuar marrëveshjen për periudhën nga data e njoftimit deri në marrjen e vendimit mbi përjashtimin ose jo të zbatimit të nenit 5 të këtij ligji.

4. Në bazë të një kërkesë, përjashtimet mund të shtyhen në kohë, nëse kushtet e përcaktuara në nenin 5 të këtij ligji vazhdojnë të plotësohen. Shtyrja mund të jepet vetëm për ndërmarrjet pjesëmarrëse, të cilat deklarojnë pëlqimin e tyre me shkrim pranë Autoritetit. Deklarata bëhet në mënyrë të pavarur nga çdo ndërmarrje dhe pranohet brenda 3 muajve para mbarimit të afatit të përjashtimit.

5. Ky nen nuk zbatohet për përjashtimin e kategorive të marrëveshjeve të parashikuara në nenin 6 të këtij ligji.”.

Neni 22

Në nenin 52 pika 2, fjalët “nenet 5, 6 dhe 7” zëvendësohen me fjalët “nenet 5 dhe 6”.

Neni 23

Neni 53 ndryshohet si më poshtë:

“Neni 53

Detyrimi për njoftim

1. Kanë detyrimin për njoftim:

a) ndërmarrjet pjesëmarrëse në bashkim;

b) ndërmarrjet që marrin nën kontroll të gjithë ose pjesë të një ose më shumë ndërmarrjeve të tjera;

c) në rast krijimi të një ndërmarrjeje të përbashkët, sipas pikës 3 të nenit 10, ndërmarrjet që kanë kontrollin e ndërmarrjes së përbashkët.

2. Njoftimi që paraqet formën e përqendrimit kryhet në bazë të udhëzimit të nxjerrë nga Autoriteti për formën e njoftimit.”.

Neni 24

Në nenin 55, pas pikës 2 shtohet pika 3 me këtë përmbajtje:

“3. Nenet 33, 35 e 36 të këtij ligji zbatohen në veprimtaritë e Autoritetit, të parashikuara në pikat 1 e 2 të këtij neni.”.

Neni 25

Në nenin 56 bëhen këto ndryshime:

1. Pika 1 ndryshohet si më poshtë:

“1. Në rast se përqendrimi nuk shfaq shenja të kufizimit në mënyrë të ndjeshme të konkurrencës në treg ose në një pjesë të tij, në veçanti, si rezultat i krijimit ose forcimit të pozitës dominuese, komisioni vendos të autorizojë përqendrimin brenda 2 muajve nga data e marrjes së njoftimit.

Nëse konstatohet se përqendrimi shfaq shenja të tilla, komisioni vendos:

a) autorizimin e përqendrimit me kushte dhe detyrime;

b) fillimin e procedurës së thelluar.”.

2. Fjalja e parë e pikës 2 ndryshohet si më poshtë:

“Në rastin e autorizimit me kushte dhe detyrime, afati i përcaktuar në pikën 1 të këtij neni shtyhet

me dy javë, nëse ndërmarrjet pjesëmarrëse angazhohen të marrin masa për eliminimin e kufizimit në mënyrë të ndjeshme të konkurrencës në treg ose në një pjesë të tij, në veçanti, si rezultat i shenjave të krijimit ose të forcimit të pozitës dominuese.”.

Neni 26

Në nenin 57 bëhen këto ndryshime:

1. Fjalja e parë e pikës 2 ndryshohet si më poshtë:

“Në rastin e autorizimit me kushte dhe detyrime, afati i përcaktuar në pikën 1 të këtij neni shtyhet me 2 muaj, nëse ndërmarrjet pjesëmarrëse angazhohen të marrin masa për eliminimin e kufizimit në mënyrë të ndjeshme të konkurrencës në treg ose në një pjesë të tij, në veçanti, si rezultat i shenjave të krijimit ose të forcimit të pozitës dominuese.”

2. Shkronja “c” e pikës 3 shfuqizohet.

Neni 27

Pas nenit 57 shtohet neni 57/1 me këtë përmbajtje:

“Neni 57/1

Pezullimi i afateve

Afatet e parashikuara në nenet 56 e 57 pezullohen nga komisioni, me vendim, nëse kjo procedurë e thelluar është penguar nga ndërmarrjet pjesëmarrëse.”.

Neni 28

Në nenin 73 bëhen këto ndryshime dhe shtesa:

1. Shkronjat “a”, “b” dhe “ç” të pikës 1 ndryshohen si më poshtë:

“a) japin të dhëna të pasakta, të paplota ose të rreme në përgjigje të kërkesës ose vendimit të komisionit, sipas nenit 33 pikat 2 e 3 të këtij ligji, ose nuk japin të dhëna brenda afatit kohor, të përcaktuar në vendimin e komisionit apo në kërkesën e sekretariatit, sipas nenit 33 pika 3 të këtij ligji;

b) japin të dhëna të pasakta, të paplota ose të rreme në njoftimet, sipas neneve 12 e 49 të këtij ligji, ose të dhëna dhe dokumente plotësuese të pasakta e të paplota, sipas nenit 55 të këtij ligji;

ç) refuzojnë t’u përgjigjen pyetjeve për faktet dhe, sipas shkronjës “d” të nenit 36 të këtij ligji, japin përgjigje të pasakta, të paplota, të rreme ose pengojnë inspektimin e parashikuar në nenin 36;”.

2. Pas shkronjës “d” shtohet shkronja “dh” me këtë përmbajtje:

“dh) nuk njofton një përqendrim, sipas neneve 10 dhe 12 të këtij ligji.”.

Neni 29

Në nenin 74 bëhen këto ndryshime:

1. Fjalja e parë e pikës 1 ndryshohet si më poshtë:

“Komisioni vendos gjoba, në masën deri në 10 për qind të xhiros së ndërmarrjes, të vitit financiar paraardhës, për çdo ndërmarrje pjesëmarrëse që:”

2. Shkronja “ç” e pikës 1 shfuqizohet.

3. Në shkronjën “d”, pas fjalëve “realizon një përqendrim” shtohen fjalët “i cili ka efekte të kufizimit të konkurrencës në treg”.

4. Pika 2 shfuqizohet.

Neni 30

Në nenin 75, fjalia e dytë e pikës 2 ndryshohet si më poshtë:
“dhe 10 për qind në rastin e xhiros në tregun përkatës të vitit financiar paraardhës të këtyre ndërmarrjeve, sipas nenit 74 të këtij ligji”.

Neni 31

Në nenin 76 pika 1 shkronja “d”, fjalët “sipas nenit 36” zëvendësohen me fjalët “sipas nenit 35”.

Neni 32

Në nenin 78, fjalët “neni 74 pika 1” zëvendësohen me fjalët “nenin 73 pika 1”, si dhe fjalët “nenit 75 pikat 1 e 2” zëvendësohen me fjalët “nenin 74 pika 1”.

Neni 33

Neni 79 ndryshohet si më poshtë:

“Neni 79 **Ankimi**

1. Kundër vendimeve të komisionit për vendosjen e sanksioneve mund të bëhet ankimi në gjykatë brenda 30 ditëve nga data e marrjes së njoftimit për vendimin.
2. Ankimi nuk pezullon ekzekutimin e vendimit të parashikuar në pikën 1 të këtij neni.”.

Neni 34

Neni 80 ndryshohet si më poshtë:

“Neni 80

Gjoka e vënë nga Autoriteti i Konkurrencës është titull ekzekutiv dhe ekzekutohet sipas dispozitave të Kodit të Procedurave Civile. Autoriteti i Konkurrencës nuk ka detyrim që të parapaguajë taksën apo tarifën për shërbimin përmbartimor.”.

Neni 35

Pas nenit 84 shtohen nenet 84/1 dhe 84/2 me këtë përmbajtje:

“Neni 84/1

Çështjet, procedurat hetimore dhe kontrollet e përqendrimeve, pavarësisht nga faza në të cilën ndodhen në çastin e hyrjes në fuqi të dispozitave të këtij ligji, do të vazhdojnë t’u nënshtrohen dispozitave të mëparshme deri në dhënien e vendimit përfundimtar të Komisionit të Konkurrencës.

Neni 84/2

Aktet e Autoritetit të Konkurrencës, të kundërshtuara në gjykatë, do të vazhdojnë të gjykohen, duke u bazuar në ligjin dhe në aktet nënligjore që kanë qenë në fuqi në çastin e fillimit të shqyrtimit gjyqësor.”.

Neni 36

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.6696, datë 4.10.2010 të Presidentit të Republikës së Shqipërisë, Bamir Topi